

雲 溪 居 士 集

三



謄錄監生臣陳

謄錄監生臣沈

祁 齋

欽定四庫全書

雲溪居士集卷二十五

宋 華鎮 撰

啟三十六首

賀新先輩二啟

右某啟伏審丕奉溫文進登榮任潔名科而肯顧稱熙
世之旁求有識所聞與時共慶新恩先輩秘校極淵源
而道學慎坊表以檢身周旋允迪于中庸博洽妙窮于
蘊奧顧失遺而彌久果薦擢以推先若綏青青慶鴻儀

之有漸脩途坦坦須驥足之無前某早叨高閨夙承善
誘漂泊三湘之遠追隨五斗之微陪夏燕以何緣跋桃
蹊而第切

右某啟伏以日月光華會千齡之聖旦雷雨作解捷三
級之龍門擢桂林之一枝振鵬圖于萬里必有國士取
先世資伏惟新恩先輩品冠月評文深霧采極淵源而
道學富藻色以摛華顯從秀異之名榮綴英雄之穀天
高氣爽甚欣一鶻之飛風急星馳更沐五雲之貺感銘

增切叙致奚殫

賀宮使觀文相公啟

右某啟伏以解劇師垣承華道館煥優賢之異數敷逸老之豐規凡沐埏鎔敷同欣仰宮使觀文相公道光前哲望聳當朝由仁義以濟時緣儒雅以飭事表儀百辟鎮撫四方茂德齒以兼崇濟功名而並峻言為不苟進退有儀態辭機政之隆出莫藩維之重清風益遠素志彌高顧仗節以猶繁想安車而就逸琳宮錫羨暫申和

理之休玉鉉調元終謝老成之用某夙塵陶冶逖間門
牆繫想增勤欣榮第切

謝解啟

右某啟蟠木誰容始愧輪囷之醜大匠無棄卒收尋尺
之長旋自省循益懷矜惕竊以太常奏籍必登秀異之
倫鄉老獻書務極賢能之選惟是辨論之重實干治忽
之幾振古所嚴盛時惟甚國家聲猷累洽俊乂克生鄒
魯萬邦唐虞七世異人並出有光西漢之隆多士以寧

益邁岐周之盛穆穆盡可封之俗鏘鏘皆入穀之英式
新詔條用精士選申重登高之賦遵明載道之經根本
藝文英華音律金聲玉振不容繡悅之迂雷發雲興詎
溺雕蟲之小家受菁莪之育人成翹楚之奇馳騖儒林
畔鋤道術掞卿雲之麗藻挹姬孔之淳源掄材鄧林自
盡梗柟之美閑馬燕市前多驛驛之良允惟俊人乃稱
公選如某者潛心徃哲述業晚生步雖歷於藩籬識未
通于堂奧非謝家之蘭玉乏言偃之淵源一日未忘三

餘自勵奉過庭之訓雖夙聞于義方撫滿籧之金尚有
慙于世業曩齒上庠之列獲參造士之聯愧擢秀于鄉
枝輒頰翎于陶夢惟齒髮之尚少撫志氣以方剛會逢
鳬藻之期恥作鱸尊之客欣聞丹詔載曳長裾效主鴈
之能鳴冀囊錐之穎脫桑林合舞雖操游刃之餘牧野
誓師尚憚如林之旅致茲忝冒粵有夤緣斯蓋伏遇某
官先生識量恢闊德明昭晰藻色士類翌贊帝猷鳴律
吹噓不間鄒生之黍運斤翦拂兼容匠石之樗爰俾散

材獲先方物某敢不日新學殖時味道腴銳朝氣以無
前見大敵而鼓勇當年鏃翮雖已愧於一飛今日焚舟
誓圖成于再戰庶無忝辱少答恩私

謝解啟

右某啟今月十八日伏覩解榜叨預薦名者文闈較藝
幸無罷黜之羞士籍聯名僅預甄揚之列循涯知愧撫
已自慙竊以兩漢得人皆本孝廉之舉三代取士必因
州里之書故為善於家者方見任于朝而未優于學者

不敢進于仕賢能之選既廢言語之科聿興搞華多畫
餅之言論道鮮成章之業非慎妍媸之鑑難忘菽麥之
昏操衡石之權者苟無至當之歸事枝葉之辭者誰是
不刊之論所以珉玉並進駕驥爭馳決先衆人豈必八
龍之秀沈居下列能無一鶻之才若某者幼承義方長
被明訓棄箕裘之緒業玩竹帛之遺文雖無三箧之奇
常冀五車之博黃卷相對幾忘寒暑之遷擔石無儲不
起紛華之悅有意古人之學無心流俗之同文恥雕龍

辯羞炙轂不顧巴人之和衆常憐郢曲之調高屢塵明
哲之知敢固顙蒙之守黽俛三春棲遲數年謹無朝夕
之渝肯有丹青之變月評借譽嘗居多士之先鄉版薦
名曾玷一經之首自意涇渭之易辨豈期鑒枘之相違
勉為方物之先槩作溝中之斷進觀前列且非刈楚之
精搜退處後塵徒起積薪之永嘆棄捐僅脫甄采有階
此蓋伏遇知府給事先生青瑣巨儒黃扉元老暫屈鈞
調之器來專屏翰之權志重提衡務先推轂曲直兼取

尋尺不遺致茲散木之材預此充庭之貢敢不淬乃鋒刃整其羽翰發揚搏擊之心憑藉扶搖之便冀秦明之再戰忍毛遂之備行渡河焚舟誓刷函關之恥捧盤歃血決成楚國之盟庶鞭欵段之資仰答薦論之賜過比以往未知所裁

又

某竊以求賢用事明王尤重於得人發策決科君子宜先於盡道取之苟且則鮮不失士得以僥倖則祇自貽

蓋上當嚴論辨之程下必盡修明之術核之匪實能無
濫進之人應以有餘方免過情之謗國家百年累洽六
聖重熙文風暢於四方聲教覃於九有操衡石之權者
宜有至明之鑑擣華藻之文者肯懷苟得之心求之盡
公進必以禮珉玉雖渾駕驥自殊

上海門交代知縣呂通直啟

右某啟鄭錦當裁礪鉛鋒而請試魯塵方絕策駕步以
求前雖知仍舊以圖徽尚冀告新而為益交代知縣通

直道腴充寔吏術疎通稔效智於官聯浸飛華於表著
鳴絃結課已登優最之科馳駟揚庭行冠選綸之首陽
和在候福履惟休眷清晤以尚遙動忻虛而第切

謝湖南知縣啟

右某啟茲者叨寵宸綺備員漕臺已及蠲剛祇親簿領
馳短毫而未迨賁榮檢以先臨仰服撫勤俯增愧惕伏
惟知縣某官美德世濟長才自成製鄭錦以致工運庖
刀而多暇服禮過厚執謙有光增銘異數之先兼幸餘

陰之庇

代回知縣長官啟

右某啟尺牘見貽華牋為副禮緣情而可貴辭溢美以
非宜未諧覲止之期已識勤斯之意欣懷彌至敷叙奚
殫

謝交割湖南帳勾職事啟

右某啟鶚表論薦驟竊所知綸言允俞遂膺成命脫徒
勞於屬郡當妙選於使臺忝越既多驚榮惟甚竊以不

求其備雖君子之與人慎簡乃僚亦前王之攸訓况漕臺之雄府領全楚之舊邦下疊蠻徭上資調度轉輸維富籍記宜詳取自疇人之中俾聞一路之事董司期會參贊經營宜得琳琅之材庶裨金穀之政如某者術知好古識愧隨時第聞詩禮之言惟蹈搢紳之訓淵明設戶無慮常闢元凱守經幾至成僻甘蜀人之寂寞恥季子之揣摩曲學羞弘守儒嗤固東山遠引襟披安石之風鑑水浩歌心醉季真之味鄉評則厚世道彌疎既淡